



# basic education

---

Department:  
Basic Education  
**REPUBLIC OF SOUTH AFRICA**

## **SENIOR CERTIFICATE EXAMINATIONS/ NATIONAL SENIOR CERTIFICATE EXAMINATIONS**

**SISWATI LULWIMI LWASEKHAYA (HL)**

**LIPHEPHA LEKUCALA (P1)**

**2022**

**EMAMAKI: 70**

**SIKHATSI: Ema-awa 2**

**Leliphepha linemakhasi la-13.**

## TICONDZISO KULABAHLOLWAKO

1. Leliphepha lehlukaniwe TIGABA LETINTSATFU:  
SIGABA A: Sivisiso (30)  
SIGABA B: Sifinyeto (10)  
SIGABA C: Takhi netimiso tekusetjentiswa kwelulwimi (30)
2. Fundza TONKHE ticondziso ngekunakisisa.
3. Phendvula YONKHE imibuto ngeSiswati.
4. Cala LESO NALESO SIGABA ekhasini LELISHA.
5. Dvweba umugca emva kwaleso naleso sigaba.
6. Tinombolo tetimphendvulo atihambisane naleto letisephepheni lemibuto njengobe tinjalo.
7. Shiya umugca emkhatsini wetimphendvulo takho.
8. Caphelisisa sipelingi/lupelomagama nendlela lewakha ngayo imisho.
9. Siphakamiso sekulawulwa kwesikhatsi:  
SIGABA A: Lokungenani emaminithi la-50.  
SIGABA B: Lokungenani emaminithi la-30.  
SIGABA C: Lokungenani emaminithi la-40.
10. Bhala ngebunono nangesandla lesifundzekako.

**SIGABA A: SIVISISO****UMBUTO 1**

1.1 Fundza lethekesthi bese uphendvula imibuto lelandzelako.

**ITHEKSTHI A****BUNTFU**

- 1 Buntfu ngumtiya lohlanganisa bantfu bahlalisane ngekuthula. Kungako bantfu labadzala batsi umuntfu ngumuntfu ngebantfu. Lenkhulumo iliciniso ngobe akekho umuntfu longaphila imphilo yakhe yonkhe ayinkhomo ledla yodvwa. Ungaba sigwili lesinetigidzigidzi temarandi kepha bantfu uyabadzinga. Ungaba luphuya lolungenasenti kepha kukhona lapho ungaba lusito khona kulabo lophila nabo. Kunebantfu labatsi uma banemali lenyenti, konkhe kubahambela kahle, batfwale lilundza bacabange kutsi abamdzingi lomunye umuntfu. Batfotjiswa kulahlekelwa sihlobo nobe ngumuntfu labasondzeleno naye kakhulu. 5
- 2 Lucwaningo luveta kutsi buntfu emntfwini bakheka ngaletindlela: utalwa nabo, buvetwa kutfotjiswa simo lesitsite, kutentisa kute wemukeleke nekufisa kuba nabo. Buntfu lobutfokotelwa kakhulu ngulobu umuntfu latalwa nabo. Umuntfu lonaloluhlobo lwebuntfu uyatsandvwa, uyetsenjwa, uyahlonishwa futsi uyaphumelela abe sibonelo lesihle emmangweni, eveni nasemhlabeni jikelele. Buntfu bufaka ekhatsi kutitfoba, kunakekela labanye bantfu, kuhloniphana nekusita umuntfu nangabe asenkingeni. 15
- 3 Kuletinsuku buntfu sebuya ngekuya buyancipha. Tinyenti-ke timbangela tekufiphala kwebuntfu. Bantfu labanebantfu balimele emoyeni, enyameni nasengcondvweni, balinyatwa bantfu lababatsandzako, lababetsembako, lababahloniphako nalababasitile. Loko kudale kwehlukana kubomakhelwane emimangweni. Ngekuphela kwebuntfu, imiti leminyenti seyigucuke yaba ngemajele. Kwakhiwe imitsangala lemidze lephetsa ngadaladi losika njengensingo nobe emabhodlela laphukile kanye nagezi lonemandla. Bantfu bativalele ngobe basindzisa timphilo tabo etigebengwini. **Umuntfu akehluleki kukuvakashela emini akuvetele lemhlatsi, nawe ube ngutsatsekile bese umupha lokutsite, acedze ebusuku ameme tigebengu titewukwebela.** 20 25
- 4 Lokwa kadzeni ematje asabokotela, bunye nekukhatsalelana bekungemahlalakhona. Makhelwane uma ashonelwe bekuba ngumsebenti wemmango kutfwala lomndeni ngekudla, timali nangaletinye tinsita letidzingekekako. Phela nawusemantini ungete wakhona kutentela konkhe. Usuke ungenamandla, inhliyo idzabukile udzinga kudvudvutwa nekusitwa ngetindlela letinyenti kute umsebenti ube yimphumelelo. Lomuhla imbalwa imimango lesakwenta loko. Imindeni leminyenti seyiyatibonela kutsi iyitfola njani imali yalomsebenti wekufihla lilunga. Tintsandzane betingabonakali uma tikhona tihlobo. Letihlobo betivele tibasite labantfwana. Loko bekukhombisa buntfu kutsi umntfwana wetfu sonkhe. 30 35

5	Lokushacisako kutsi kuletinsuku buntfu sebushabalale nasetsikeni temakhaya, bobabe phela. Kuhlukunyetwa kwebantwana nabomake sekwaba yintfo yemalanga onkhe. Ngekwelisiko, umnumzane nguye loshaya umtsetfo ekhaya. Labanye-ke bobabe babese balisebentisa kabi lilungelo labo. Ubatfola sebasebentisa umzaca ekusombululeni tinkinga lebanato nemakhosikati nebantwana babo. Kuyatiwa kutsi indvuku ayiwakhi umuti kepha bobabe labalahlekelwe buntfu bayayisebentisa.	40 45
6	Inhlupheko nayo ifake sandla kakhulu ekupheleni kwebuntfu. Etindzabeni temsakato weLigwalagwala tamhla ti-28 Inhlaba 2021, kudzalulwe ludzaba lwemtali losenzaweni letsite lesemakhaya, lotfolakale endzisa umntfwanakhe loneminyaka le-15 endvodzeni leneminyaka le-50, lokuyintfo lephambene nemtsetfosisekelo wakulelive lotsi umuntfu unelilungelo lekutikhetsela. Kusolelwa ekutsini lomtali naye bekatama taba tekucosha likati etiko njengobe uma kulandzelelwa lomndeni, ungumndeni lodla imbuya ngelutsi.	50
7	Etikolweni buntfu kumele bukhonjiswe lubumbano lolukhona emkhatsini webaphatsi, bothishela nebafundzi. Kuletinsuku konkhe loku sekushabalele ngenca yebafundzi labangene shi ekudleni tidzakamiva lokugcina kudale ludlame. Tikolo tibukene nebumatima bekusita labo labasetinkingeni. Tinyenti timphi letilanyulwako etikolweni kodvwa kufane nekutihlupha. Labati kancono batsi ludlame lunemtselela lomubi esimilweni sebafundzi. Lufake nesandla ekutseni labanye bafundzi bangeti etikolweni ngemalanga ekufundza, bagcine bayekela sikolo ngenca yeludlame lolubangwa ngulokuphela kwebuntfu.	55 60
8	Babe Nelson Mandela emavini akhe ekukhutsata watsi bantfu labanemandla abente umehluko kulabanye bantfu. INingizimu Afrika iyadvunyiswa ngekubungata lusuku lwaMandela njalo ngenyanga yaKholwane. Lolu lusuku lolubungatwa kute kukhunjulwe imisebenti lemihle layenta yekulwela bunye nebuntfu eveni. Lolusuku luyindlela yekugcugcutela sive ngebuntfu. Kunemaminithi la-67 lamiselwe kutsi bantfu bawagcine uma babungata lolusuku kusita labo labeswele.	65
9	<u>Live leNingizimu Afrika lilive leluju netinyosi.</u> Licebile ngato tonkhe tindlela. Kunetimbiwa letehlukahlukene letigujwa etimayini. Lomcondvo waMandela wekusita shengatsi ungaba kubo bonkhe bantfu, kutewuncipha labondzingasitsebeni labasemigwacweni. Labasenawo emandla abaphose litje esivivaneni.	70

[Itsetfwe: Tinkhundla tekuchumana, 2021]

1.1.1 Yini intfo levetwe endzimeni yekucala levame kutfobisa umuntfu imente agcine asanebuntfu?

(1)

- 1.1.2 Nguyiphi inkhulumo lephikisa lelelandzelako?  
'Kudla imbuya ngelutsi.'  
Khetsa imphendvulo yakho kuletilandzelako.  
A Kudla litsanga lelibitako.  
B Kudla lihabhula lelikhulu.  
C Kudla liwolintji lelimnandzi.  
D Kudla kusale emphilweni. (1)
- 1.1.3 Bhala umcondvo loletfwa ngulenkulumo lelandzelako:  
'Umuntfu ngumuntfu ngebantfu.' (2)
- 1.1.4 Kuletheksthi lengenhla, umuntfu lonebuntfu ubonakala ngatiphi timphawu? Bhala TIMBILI. (2)
- 1.1.5 Yini leyenta bantfu bafake imitsangala lemidze emakhaya abo? Bhala emaphuzu LAMABILI lasenzimani ye-3. (2)
- 1.1.6 Ngutiphi tindlela LETIMBILI letisetjentiswa yimindeni etikhatsini talomuhla kutfolo imali yekuchuba umsebenti uma kwehle lifu lelimnyama? (2)
- 1.1.7 Bhala KUBILI locabanga kutsi kubangele lomtali lekukhulunywa ngaye atsatse sincumo sekwendzisa lomntfwana kulomuntfu lomdzala kangaka. (2)
- 1.1.8 Kuhlukunyetwa kwebantfwana malanga onkhe lokuvetwe endzimani yesihlanu, kunamiphi imitsetela etimphilweni tabo? Bhala MIBILI. (2)
- 1.1.9 Hulumende utisita ngatiphi tindlela tikolo letibukene nekwandza kweludlame? Nika TIMBILI. (2)
- 1.1.10 Uyavumelana yini nalokushiwo ngulomugca lodvvetjelwe endzimani yekugcina ngeNingizimu Afrika? Sekela ngemaphuzu LAMABILI. (2)
- 1.1.11 Uma unganikwa litfuba lekuba ngumholi emmangweni wangakini, ngutiphi tindlela LETIMBILI longavuselela ngato buntfu? (2)

1.2 Fundza lesibonwa bese uphendvula imibuto lelandzelako.

**ITHEKSTHI B**



[Itsetfwe: Alarmpictures.com]

- 1.2.1 Nika sizatfu lesenta lomuntfu loseFREYIMINI YE-1 angasebentisi lisango uma afuna kungena kulelikhaya. (1)
- 1.2.2 Yini letawenta kube matima kutsi emaphoyisa asibambe lesigebengu lesingena kulelikhaya leliseFREYIMINI YE-2? (1)
- 1.2.3 Banikati balamakhaya bangayisombulula njani inkinga yalokwenteka eFREYIMINI YE-1, 2 neye-3? Bhala KUBILI. (2)
- 1.2.4 Batiphakamiseleni tandla labantfu labaseFREYIMINI YE-4? Bhala KUBILI. (2)
- 1.2.5 Kuyasita yini kwakha imitsangala lemidze njengobe kushiwo emgceeni lodvwetjelwe endzimeni yesitsatfu kutheksthi A uma ucatsanisa nalokwenteka eFREYIMINI YE-1 neye-3 kutheksthi B? Chaza. (2)
- 1.2.6 Bhala budlelwano lobukhona emshweni lobhalwe wacindzetelwa endzimeni ye-3 kuTheksthi A naloku lokwenteka kuTheksthi B eFREYIMINI YE-2. (2)

**SAMBA SESIGABA A: 30**

**SIGABA B: SIFINYETO****UMBUTO 2**

Fundza lethekesthi bese uyayifinyeta ngewakho emagama la-80. Sifinyeto sakho **asivete emaphupho lasikhombisa Hloniphile lafisa kuwafeza emphilweni yakhe.**

**CAPHELA**

1. Sifinyeto sakho asibe ngendlela yetindzima (emapharagrafu).
2. Akukadzingeki kutsi ubhale sihloko.
3. Khombisa linani lemagama lowasebentisile ekugcineni kwesifinyeto sakho. (Linani lemagama alibe setibiyelweni.)

**ITHEKSTHI C****EMAPHUPHO EMPHILO**

Hloniphile ngumntfwana lowakhulela ekhaya lebelitsatsela phasi imfundvo. Banakabo bashiya phasi bangakefiki emabangeni lasetulu. Lobekumcoka kubo kwelusa tinkhomo kunekubukana nemabhuku. Bekaba yinhlekisa kubanakabo nakwentekile wangaphumeleli esifundweni lesitsite kodwa bekangakushayi mkhuba loko. Bantfwana labanyenti bakhula banemaphupho labafisa kuwafeza. Emaphupho ayamkhutsata umntfwana uma asafundza kutsi asebente ngekutimisela. Hloniphile naye bekanemaphupho ngemphilo yakhe.

BekunguMsombuluko, kulilanga lekugcugcutela bafundzi bakamatekuletjeni. Wevakala acela kwetfula tifiso takhe kubontsanga. 'Njengobe ngisafundza libanga lelishumi nakubili, liphupho lami kuphumelela ngemalengiso kute ngitewufundzela tifundvo tebunjinyela. Ngiyati kutsi kudzingeka kutimisela, kungalali, kungaphutselwa esikolweni nekucela lusito kubothishela bami labangifundzisako.

Live letfu selintjintjile, sekugcwele iTheknoloji. Kunemishini lekhuluma njengebantfu. Ngifisa kutibona ngisebenta nge-inthanethi kute ngibe nelwati lolunyenti ngemphilo. Kutanginciphisela nemsebenti wekuhamba ngifunana nelusito kubuye konge nemali. Uma kukhona lengikudzingako ngitawuvele ngikutfole lapha endlini.

Simo semphilo siya ngekuba matima, nanobe ngitawube ngisebenta, kepha liphupho lami kuba nelibhizinisi kute ngidale emafuba emsebenti. Bantfu bakitsi bayakujabulela kubona umuntu lomusha atfutfuka.

Ngitalelwe emmangweni, ngakhuliswa ngummango ngabuye ngafundza matekuletjeni kuwo lommango lengitalelwe kuwo. Kuliphupho lami kutibona ngisita ummango wangakitsi ngekuwakhela indzawo yekugcina bantfu lesebakhulile. Labanye balabantfu labadzala batsi bangakhula bese bagcina beswela tihlobo letibanakekelako.

Mine ngifisa kuba nemali lengasiyinyenti ngalokwedlulele kute ngingangeni enkingeni yekutikhukumeta. Bantfu labanemali lenyenti abatsandvwa kahle emmangweni kantsi nabo bayesaba kuhlanyela nalabanye ngekwesabela timphilo tabo. Ngalesinye sikhatsi bantfu labanemali lenyenti bagcina sebadlala ngayo.

Ngingumuntu lotsandza bantfu njengobe nami bangitsandza. Kuhle kutsi nami ngibe nendlu lebita mine ngitewuhlonipheka emmangweni, bantfu bangibite ngaNkhosatana Hloniphile lonelikhaya lakhe lelinesitfunti.

Uma ungumuntu, kuhle kulanganyela kuko konkhe lokwenteka emmangweni, njengemigidvo, imingcwabo kanye naleminyane imicimbi ledzinga wonkhe umuntu. Kuyasita loko ngobe kulapho ufundza simo senhlalo sakulowo mmango. Kuliphupho lami nami kutsi ngitibandzakanye emihlanganweni yemmango.'

Watsi angakacedzi kukhuluma, liklasi beselime ngetinyawo selishaya tandla. Banyenti labagcugcuteleka ngalelo langa.

[Itsetfwe ku-inthanethi, 2021]

**SAMBA SESIGABA B: 10**



## SIGABA C: TAKHI NETIMISO TEKUSETJENTISWA KWELULWIMI


### UMBUTO 3

Fundza lesikhangisi bese uphendvula imibuto lelandzelako.

### ITHEKSTHI D

**INKHOSI YEBOSI BENYAMA!**

**MADLISA SHISANYAMA**



**UDVONSWA LIPHUNGA LENYAMA UKAKHO.**

- Sosa loku lokulandzelako:
  - Siteki
  - Emancondvo enkhukhu
  - Ematfumbu
  - Sibindzi senkhomo
- Toso tihambisana nembhidvo wetintsanga eceleni.
- Bosi bakaMadlisa bangemanono, abahlalwa yimphungane.
- Ufaka imali usendlini, toso titifikele ekhaya lakho ngelitubane.
- Ungaphutselwa, tsintsana natsi nyalo, sikuletsele, **udle ulale.**

Akulalwa!!!

Sivala ngensimbi yelishumi nakubili ebusuku!

[Itsetfwe: <http://www.alamypictures.com>]

- 3.1 Kubhalwa kwesicubulo ngetinhlavu letinkhulu kubasita njani batsengisi? (1)
- 3.2 Ngubaphi batsengi labazuzako ngaloku lokukhangiswako kulesikhangisi? (1)
- 3.3 Lencenye yemusho lebhalwe yacindzetelwa kulesikhangisi ikuyiphi indlela yesento?  
Khetsa imphendvulo kuletilandzelako:
- A Indlela lecondzile.  
B Indlela leyamile.  
C Indlela yesimo.  
D Indlela lesalibito. (1)
- 3.4 Phindza ubhale lomusho lolandzelako bese udvwebela ligama lelibuniyo (bunikati).  
Ufaka imali usendlini, toso titifikele ekhaya lakho ngelitubane. (1)
- 3.5 Yini lengenta kutsi batsengi baye kaMadlisa hhayi kuletinye tindzawo tekosa uma bafuna inyama? Bhala KUBILI. (2)
- 3.6 Veta sizatfu lesenta sitsi lenkhulumo ledvwetjelwe kulesikhangisi iyinkhohliso. (2)
- 3.7 Kushiywa kwemininingwane letsite njengobe kwentekile kulesikhangisi kungaba namuphi umtselela kulelibhizinisi? (2)
- [10]**

**UMBUTO 4**

Fundza lekhathuni bese uphendvula imibuto lelandzelako.

**ITHESKTHI E**

[Itsetfwe: <http://www.alamycartoons.com>]

- 4.1 Nika KUNYE lokufakazela kutsi labantfu labakulekhathuni bayakutsandza kufuya. (1)
- 4.2 Khokha umusho lonesifanisongco uwubhale phasi. (1)

- 4.3 Bhala lomusho bese ufaka libintana lelimele ligama lelidvwetjelwe kulomusho lolandzelako.  
Chubeka usenge lenkhomo, iyinsengwakati. (1)
- 4.4 Lenkhulumo lelandzelako iluhlobo luni lwenkhulumo?  
'Asimyekele LaMotsa, angitsi yena utenta indvodza yasemakhaya.'  
Khetsa imphendvulo kuletilandzelako:  
A Inkhulumo leyimfundzisolite.  
B Inkhulumo letsatsa luhlangotsi.  
C Inkhulumo letsintsa imiva.  
D Inkhulumo yemandla ekuphatsa. (1)
- 4.5 Yini sizatfu sekutsi lomake abambe sandla salomntfwana? Bhala KUNYE. (1)
- 4.6 Lobabe uwukhombelani lomhlambi wetinkhomo letikulekhathuni? (1)
- 4.7 Kuliciniso nobe kungumbono yini kutsi lenkhulumo lebhalwe yacindzetelwa itsatsa luhlangotsi? Chaza. (2)
- 4.8 Uma kubukwa bantfu labakulekhathuni, uvumelana kangakanani ngekutsi ayivuni bulili? Sekela imphendvulo yakho. (2)

**[10]**

**UMBUTO 5**

Fundza lethekesthi bese uphendvula imibuto lelandzelako.

**ITHEKSTHI F****KUTIJABULISA EHLOBO**

Lihlobo selingenile, liningi lebantfu likhetsa kuvakashela elwandle. Lusizi luyaphela uma uye khona. Labanye bantfu bakubona kukucitsa imali kuya kuletindzawo ngobe basuke banetidzingo letinyenti.

Mthokozisi ngulomunye lohambela tindzawo tekuvakasha, utsi sigwaca lesihle ngulesishoshako. 'Njalo ngemaholide aseNtswasahlobo siyatikhipha nemndeni wami siyewushaywa ngumoya elwandle. Kumnandzi kudlala ngemanti.' Kushisa akusiyo intfo lengahle iphatamise bantfu baseThekwini nasetindzaweni letiseNingizimu yakaZulu-Natal, njengobe kungashisi kakhulu kuletindzawo. **LiTheku yindzawo leshisako ebusika. Bantfu bakuleyo ndzawo abatsikameteki ngekuyotijabulisa elwandle ebusika.**

Lokumele kube mcoka kubo kutsi batfole **tindlela** letehlukene labangatijabulisa ngato uma kungulesikhatsi semnyaka, kute babalekele kutifola bativalele etindlini nome bacitse imali ngalokungenasidzingo. Lokunye lokumcoka kutsi bantfu bati kutsi kuvakasha akusho kuphuma etifundzeni labahlala kuto kuphela. Tikhona tindzawo letingembi ecolo. Kushaywa ngumoya kuyasita ekutseni bantfu labadzala bakhohlwe kancane tinkinga letisanganisa ingcondvo. Kungako kuhambela imicimbi lesedvute nako kumcoka uma ute imali lekuvumela kutsi uvakashele etindzaweni letisekudzeni. Kuya etitolo tekudlela letisedolobheni lohlala kulo nasetinkhundleni tebumnandzi letidvutane, nguletinye tindlela tekutijabulisa. Bantfu labangenamali lenyenti bayisa bantfwababo emadolobheni ladvute nabo.

[Itsetfwe: *Isolezwe*, 26 Inkhwekhweti 2021]

- 5.1 Endzimeni yekucala kunemusho lonelibitosimo, wukhokhe uwubhale phasi. (1)
- 5.2 Shano kutsi leselulo sesento lesicindzetelwe emshweni lodvvetjelwe endzimeni yesibili siveta muphi umcondvo. (1)
- 5.3 Faka ligama lenhlonipho egameni lelidvvetjelwe kulomusho lolandzelako. Kumnandzi kudlala ngemanti. (1)
- 5.4 Bhala lemisho lemibili lecindzetelwe endzimeni yesibili usebentise sihlanganiso lesifanele kute ibe ngumusho lombici. (1)
- 5.5 Endzimeni yesitsatfu kuneligama lelicindzetelwe, litsatse wakhe umusho lonemcondvo lowehlukile kunalowo losetheksthini. (2)
- 5.6 Sebentisa sisho lesisenzimeni yesitsatfu emshweni kuveta kutsi uyayati inchazelo yaso. (2)
- 5.7 Cala lomusho lolandzelako ngekutsi: Itolo ... Bantfu labangenamali lenyenti bayisa bantfwababo emadolobheni ladvute nabo. (2)

[10]

**SAMBA SESIGABA C: 30**  
**SAMBA SAKO KONKHE: 70**